

NACRT ODLUKE

Na osnovu člana 9. i 25. Zakona o Agenciji za bankarstvo Federacije Bosne i Hercegovine ("Službene novine FBiH", br. 9/96, 27/98, 20/00, 45/00, 58/02, 13/03, 19/03, 47/06, 59/06, 48/08, 34/12 i 77/12), člana 96. do 101. i člana 248. Zakona o bankama ("Službene novine Federacije BiH", br. 27/17) i člana 18. Statuta Agencije za bankarstvo Federacije BiH ("Službene novine Federacije BiH", broj: 42/04), Upravni odbor Agencije za bankarstvo Federacije Bosne i Hercegovine na sjednici održanoj dana __.__.2017. godine donosi:

ODLUKU O KUPOPRODAJI PLASMANA BANKE

1. OPĆE ODREDBE

Član 1.

Predmet odluke

- (1) Ovom odlukom propisuju se minimalni standardi i uvjeti koje moraju ispunjavati plasmani koji su predmet kupoprodaje, opći i posebni uvjeti za kupoprodaju, finansiranje kupoprodaje, način procjene vrijednosti predmeta kupoprodaje i dokumentacija koju banka, za potrebe ispunjavanja propisanih uvjeta, dostavlja Agenciji za bankarstvo Federacije Bosne i Hercegovine (u daljem tekstu: Agencija).
- (2) Sve banke sa sjedištem u Federaciji Bosne i Hercegovine (u daljnjem tekstu: Federacija), kojima je Agencija izdala bankarsku dozvolu i organizacioni dijelovi banke sa sjedištem izvan Federacije dužne su primjenjivati odredbe ove odluke, uključujući i ostale učesnike kako je to propisano Zakonom o bankama (u daljnjem tekstu: Zakon) Poglavlje VI - Poslovanje banke Odjeljak E. Kupoprodaja plasmana banke.
- (3) Na pitanja vezana za kupoprodaju plasmana banaka koja nisu regulirana ovom odlukom, a regulirana su Zakonom ili drugim podzakonskim aktima Agencije, primjenjivat će se odredbe tog zakona ili drugog podzakonskog akta.

Član 2.

Definicije i obuhvat

- (1) Pojedine definicije i pojmovi koji se koriste u ovoj odluci imaju sljedeće značenje:
 - a) **Plasmani**, u smislu ove odluke, su finansijska imovina u obliku:
 - potraživanja po glavnici kredita, kamati, naknadi i drugim potraživanjima koja se priznaju u izračunu efektivne kamatne stope odobrenog kredita;
 - zajmova, ulaganja, kao i
 - ostalih potraživanja na osnovu kojih banka može biti izložena kreditnom riziku neispunjenja obaveze druge ugovorne strane.
 - b) **Dospjeli plasmani** su plasmani kod kojih:
 - 1) su glavnica ili dio glavnice (rata) i/ili kamata dospjeli, a nisu naplaćeni na dan dospijeća ili duže; ili

2) su dospjele obveze po kamati kapitalizirane, osim plasmana, koji se nakon kapitalizacije kamate/reprograma, uredno servisiraju.

c) **Materijalno značajnim iznosom plasmana za kupoprodaju plasmana** smatra se nominalna knjigovodstvena vrijednost definirana u tački e) ovog člana jednog ili više pojedinačnih plasmana, čiji je kumulativni iznos, prema izvještajima dostavljenim Agenciji, najmanje 12 mjeseci koji prethode danu obavještanja Agencije o namjeravanoj kupoprodaji, jednak ili veći od 10% priznatog kapitala (regulatorni kapital definiran u tački g) ovog člana) banke prodavca. Izuzetno, za banke koje imaju priznati kapital preko 400 miliona KM materijalno značajni iznos za kupoprodaju plasmana smatra se nominalna knjigovodstvena vrijednost jednog ili više pojedinačnih plasmana čiji je kumulativni iznos jednak ili veći od 40 miliona KM u periodu od 12 mjeseci prije obavještanja Agencije o namjeri kupoprodaje plasmana.

Materijalno značajan iznos plasmana utvrđuje se u odnosu na jednog kupca i grupu s njim povezanih lica kako je uređeno članom 2. stav (1) tačka u) Zakona.

d) **Nekvalitetni plasmani** su plasmani koji, u pravilu, ne donose prihod, a nastaju kada:

1) su glavnica i/ili kamata dospjele i nisu naplaćene duže od 90 dana od dana njihovog inicijalno ugovorenog dospijeća, odnosno kada su u skladu sa odlukom Agencije, kojom se utvrđuju minimalni standardi za upravljanje kreditnim rizikom i klasifikaciju aktive banaka, klasificirani u kategoriju C, D i E; ili

2) su kamate, koja nisu naplaćena duže od 90 dana od njihovog inicijalno ugovorenog dospijeća, kapitalizirane.

e) **Nominalnu knjigovodstvena vrijednost plasmana** čini knjigovodstveni iznos potraživanja koji je iskazan u bilansu banke prodavca i koji nije umanjen za ispravke vrijednosti za glavicu, kamatu i naknadu.

f) **Prestanak priznavanja** je uklanjanje prethodno priznate finansijske imovine ili finansijskih obaveza iz izvještaja o finansijskom položaju subjekta u skladu sa Međunarodnim računovodstvenim standardom 39 - Finansijski instrumenti: priznavanje i mjerenje, tačke 17. do 20. Ugovorom o kupoprodaji definiše se da se plasman u cijelosti prenosi na kupca, kao i sva prava, rizici i koristi koji proizilaze iz plasmana, te na taj način plasman se prestaje priznavati u bilansu banke prodavca.

g) **Priznati (regulatorni) kapital** je zbir osnovnog i dopunskog kapitala, nakon regulatornih usklađivanja, a predstavlja iznos iskazan u posljednjem izvještaju dostavljenom Agenciji. Ako u izvještajnom periodu dođe do bitne promjene u priznatom kapitalu (npr. dokapitalizacija, iskazani gubitak), za izračun materijalno značajnog iznosa plasmana koristi se izmijenjeni priznati kapital.

h) **Korisnik plasmana** koji je predmet kupoprodaje u smislu ove odluke je pravna ili fizička osoba i korisnik finansijskih usluga u smislu Zakona kojim se uređuje zaštita korisnika finansijskih usluga, na koju, kao dužniku glasi plasman i sve obaveze u pogledu rizika i koristi s osnova plasmana koji je predmet kupoprodaje.

(2) Pojedine definicije iz ove odluke izuzev pojmova navedenih u stavu (1) ovog člana imaju značenja navedena u članu 2. Zakona.

Član 3.

Predmet ugovora o kupoprodaji plasmana

- (1) Banka prodavac može ugovoriti kupoprodaju plasmana ili kupoprodaju rizika i koristi s osnove plasmana s banke prodavca na društvo koje se bavi kupoprodajom plasmana, s ciljem trajnog prestanka priznavanja plasmana u bilansu banke u skladu s Međunarodnim standardima finansijskog izvještavanja. Kupoprodaja nedospjelih plasmana može se vršiti samo između banaka.
- (2) Banka prodavac ne može ugovoriti kupoprodaju dijelova plasmana, niti dijelova prava i obaveza iz plasmana (djelomični novčani tokovi iz plasmana), niti može procjenjivati da li će prodani plasman evidentirati u bilansu ili ne, nego mora ugovoriti kupoprodaju isključivo cijelog plasmana i svih prava, sporednih prava i obaveza iz plasmana i mora ga prestati priznavati u bilansu stanja u cijelosti.
- (3) Ugovor o kupoprodaji plasmana iz stava (1) ovog člana, banka prodavac može zaključiti, nakon što je dobila saglasnost Agencije za kupoprodaju plasmana utvrđenih ovom Odlukom a kojom se potvrđuje da su ispunjeni opći uvjeti kupoprodaje plasmana, kao i posebni uvjeti za kupoprodaju materijalno značajnog iznosa plasmana, propisani Zakonom i ovom Odlukom.

Član 4.

Uvjeti koje mora ispunjavati kupac predmeta kupoprodaje

- (1) Kupac predmeta kupoprodaje, u smislu ove odluke može biti svaka pravna osoba registrirana za djelatnost kupoprodaje plasmana, a za plasmane odobrene korisnicima finansijskih usluga kupac mora imati dozvolu za rad i biti pod nadzorom Agencije.
- (2) Banka prodavac je dužna, prije donošenja odluke o zaključivanju ugovora, izvršiti procjenu kupca s aspekta pravnog statusa, njegove poslovne i finansijske, kadrovske i tehničke sposobnosti za preuzimanje predmeta kupoprodaje.
- (3) Procjenu finansijske sposobnosti kupca banka vrši provjerom:
 - a) Urednosti kreditne historije u tekućoj godini – uvidom u izvještaj iz CRK-a baze podataka CBBiH prema kojem ni jedna eksponiranost nije evidentirana kao nekvalitetna, niti je postojala eksponiranost koju je bilo koja finansijska institucija otpisala na teret svoga poslovanja.
 - b) Finansijske snage i sposobnosti za kupovinu plasmana – dokaz i podaci o:
 - 1) izvorima sredstava za plaćanje ugovorene cijene,
 - 2) visini ukupne neto poslovne aktive kupca koja mora biti najmanje na nivou iznosa kupljenog plasmana, a prema posljednjim finansijskim izvještajima koje je kupac sačinio,
 - 3) ukupnom kapitalu kupca koji mora iznositi najmanje jednu desetinu iznosa namjeravane vrijednosti predmeta kupoprodaje, prema posljednjim finansijskim izvještajima koje je kupac sačinio,
 - c) Postojanja povezanosti kupca sa dužnikom – izjava o postojanju, odnosno ne postojanju međusobne povezanosti u smislu definicija iz člana 2. tačka u) Zakona.
- (4) Procjenu kadrovske i tehničke sposobnosti kupca predmeta kupoprodaje, banka prodavac vrši provjerom:

- a) Kadrovske osposobljenosti – procjenom vlasnika i ključnih zaposlenika kupca u pogledu znanja, kvalifikacija i osposobljenosti u odnosu na materijalnu značajnost predmeta kupovine, te da nisu osuđivani za krivična djela iz oblasti finansija, tržišta kapitala, pranja novca i finansiranja terorističkih aktivnosti, i
 - b) Tehničke osposobljenosti – dokaza informatičke opremljenosti i osposobljenosti za praćenje i evidentiranje naplate otkupljene tražbine i izvještavanje i ažuriranje podataka u Centralni registar kredita u skladu sa propisima Centralne banke BiH (u daljnjem tekstu: CBBiH), osim u slučaju da banka u ime i za račun kupca vrši naplatu ustupljenog potraživanja od korisnika.
- (5) Ako je kupac predmeta kupoprodaje iz iste bankarske grupe u BiH, ili banka prodavac ima kontrolno učešće kod kupca predmeta kupoprodaje, banka prodavac je dužna postupiti u skladu sa odredbama člana 6. stav (2) ove odluke.

Član 5.

Obaveze banke prodavca prije donošenja odluke o kupoprodaji plasmana

- (1) Banka prodavac je, prije donošenja odluke o sklapanju ugovora o kupoprodaji plasmana, dužna:
- a) osigurati da nezavisni procjenjivač izvrši procjenu vrijednosti potraživanja,
 - b) provjeriti da li iznos plasmana namijenjenog kupoprodaji ispunjava kriterije o materijalno značajnom iznosu plasmana za kupoprodaju plasmana iz člana 2. tačke c) ove odluke.
 - c) bez obzira na visinu iznosa plasmana ili rizika i koristi s osnove plasmana, koji se ugovorom namjeravaju prenijeti s banke prodavca na kupca, izvršiti procjenu efekata prodaje plasmana na banku nakon prodaje u odnosu na:
 - 1) finansijski rezultat banke,
 - 2) kontinuitet poslovanja,
 - 3) reputaciju banke,
 - 4) izloženost rizicima,
 - 5) solventnost banke,
 - 6) na likvidnost banke, te
 - 7) na zaštitu korisnika finansijskih usluga, ako su predmet prodaje plasmani odobreni korisnicima finansijskih usluga.
 - d) izvršiti procjenu kupca sa aspekta njegove finansijske, kadrovske i tehničke sposobnosti za preuzimanje predmete kupoprodaje, u skladu sa općim uvjeti koje mora ispunjavati kupac predmeta kupoprodaje iz člana 4. ove odluke.
- (2) Nezavisni procjenjivač, iz stava (1) tačka a) ovog člana može biti:
- a) fizička osoba koja obavlja djelatnost procjene ekonomske vrijednosti, čiji su status i djelatnost uređeni posebnim propisom u Federaciji Bosne i Hercegovine i kojima je Federalno ministarstvo pravde izdalo licencu za rad, i
 - b) privredno društvo za procjenjivanje ekonomske vrijednosti koje ispunjava uvjete utvrđene posebnim propisom u Federaciji Bosne i Hercegovine i koje, na osnovu

saglasnosti Federalnog ministarstva pravde, u sudskom registru ima upisanu djelatnost procjenjivanja ekonomske vrijednosti.

2. OPĆI I POSEBNI UVJETI ZA KUPOPRODAJU PLASMANA

Član 6.

Opći uvjeti za kupoprodaju plasmana

- (1) Da bi banka prodavac mogla zaključiti ugovor o prodaji plasmana neophodno je da ima ispunjene sljedeće uvjete:
 - a) kupoprodaja plasmana ima ekonomsku opravdanost koja se dokazuje procjenom iz člana 5. stav (1) tačka c) alineja 1), 5), i 6),
 - b) banka prodavac je sačinila procjenu efekata prodaje plasmana, prema odredbama člana 5. stav (1) tačka c) alineja 4),
 - c) finansiranje prodaje, upravljanje i naplata plasmana vrši se u skladu s odredbama Zakona i člana 8. ove odluke,
 - d) cilj prodaje nije ostvarivanje prihoda koji inače ne bi bili ostvarivi za banku prodavca.
- (2) Banka prodavac može zaključiti ugovor o prodaji plasmana sa kupcem iz iste bankarske grupe u BiH ili banka prodavac ima kontrolno učešće kod kupca predmeta kupoprodaje u smislu odredbi člana 2. pod k) Zakona ako:
 - a) cilj prodaje plasmana nije izbjegavanje ispunjavanja kapitalnih zahtjeva, ostalih bonitetnih kao i drugih zahtjeva propisanih Zakonom, ovom odlukom i drugim podzakonskim aktima donesenima na osnovu Zakona, relevantnim propisima Europske unije, za prodavca na pojedinačnoj osnovi te na konsolidiranoj osnovi za bankarsku grupu,
 - b) cilj prodaje nije ostvarivanje prihoda koji inače ne bi bili ostvarivi za banku prodavca na pojedinačnoj ili konsolidiranoj osnovi za bankarsku grupu.

Kada se radi o kupcu predmeta kupoprodaje kako je navedeno u ovom stavu, banka prodavac je dužna izvršiti analizu efekata kupoprodaje plasmana na kapital banke i tekuće poslovanje, kao i efekte na nivou grupe banaka i povezanih pravnih lica na konsolidovanoj osnovi.

- (3) Banka prodavac mora osigurati da su plasmani ili rizici i koristi po osnovu plasmana trajno preneseni na kupca.
- (4) Banka prodavac ne preuzima, neposredno ili posredno, odgovornost za kvalitet prodatih plasmana, uključujući njihovu naplativost i kreditni rejting dužnika, na osnovu kojeg je utvrđena ugovorena prodajna cijena.
- (5) U slučaju nastupanja razloga za raskid ugovora o prodaji plasmana, banka prodavac i kupac ne mogu ugovoriti povrat plasmana, ali svaka od ugovorenih strana ima pravo na naknadu štete zbog raskida ugovora.

Član 7.

Posebni uvjeti za kupoprodaju materijalno značajnih iznosa plasmana

- (1) Banka prodavac može zaključiti ugovor o kupoprodaji materijalno značajnog iznosa plasmana ako su pored općih uvjeta kupoprodaje plasmana iz člana 6. ove odluke ispunjeni i sljedeći posebni uvjeti:

- a) osiguran je trajan prijenos plasmana ili prijenos rizika i koristi s osnove plasmana u skladu s članom 11. ove odluke,
 - b) banka prodavac ne preuzima, neposredno ili posredno, odgovornost za kvalitet prodatih plasmana, uključujući njihovu naplativost i kreditnu sposobnost dužnika, na osnovu kojeg je utvrđena ugovorena prodajna cijena i
 - c) upravljanje i naplata prodatih plasmana obavlja se u skladu sa odredbama člana 9. ove odluke.
- (2) Banka prodavac je dužna najkasnije u roku od 60 dana prije zaključivanja ugovora o kupoprodaji materijalno značajnog iznosa plasmana u pisanoj formi zatražiti suglasnost Agencije o ispunjenosti općih i posebnih uvjeta kupoprodaje i dostaviti dokumentaciju propisanu u članu 12. ove odluke.
 - (3) Ako je banka prodavac sklopila više pojedinačnih ugovora o kupoprodaji plasmana s jednim kupcem i s njim povezanim licima na način kako je uređeno članom 2. stav (1) tačka u) Zakona, čija kumulativna vrijednost za period od proteklih 12 mjeseci ne predstavlja materijalno značajan iznos kako je to određeno u članu 2. stav (1) tačka c) ove Odluke, pri sklapanju novog ugovora o kupoprodaji plasmana kojim bi kumulativni iznos plasmana postao materijalno značajan, dužna je, osim općih uvjeta iz člana 6. ove odluke, pridržavati se i posebnih uvjeta iz stava (1) ovog člana.

3. FINANCIRANJE KUPOPRODAJE, UPRAVLJANJE I NAPLATA PRODATIH PLASMANA

Član 8.

Finansiranje kupoprodaje plasmana

- (1) Banka prodavac je dužna ugovoriti da će kupac svoju obavezu isplate ugovorene cijene ispuniti uplatom u cijelosti na račun banke prodavaoca odmah nakon sklapanja ugovora o kupoprodaji plasmana, a najkasnije u roku od 60 dana.
- (2) Izuzetno od stava (1) ovog člana, u vanrednim slučajevima Agencija može na zahtjev banke prodavca dopustiti i druge načine i rokove podmirivanja ugovorene cijene.
- (3) Banka prodavac ne smije neposredno ili posredno financirati prodaju svojih plasmana ili rizika i koristi po osnovu plasmana, osim ako bi izloženost koja bi nastala na osnovu financiranja u potpunosti bila osigurana namjenski bezuvjetno oročenim gotovinskim depozitom, položenim kod banke prodavca koji je u pogledu visine, valute i roka usklađen s tom izloženošću.

Član 9.

Upravljanje i naplata prodatih plasmana

- (1) Ako banka prodavac preuzima obaveze upravljanja i naplate prodatih plasmana može ugovoriti naknadu za obavljanje ovih poslova najmanje u visini stvarnih troškova i pri naplati prodatih plasmana primjenjuje iste poslovne politike i procedure koje primjenjuje pri naplati svojih plasmana, a koje su sastavni dio ugovora o kupoprodaji plasmana.
- (2) Ako obavezu upravljanja i naplate prodatih plasmana preuzima kupac, banka prodavac ga je dužna ugovorno obavezati da te postupke provodi na način da se poštuje i štiti integritet i ugled svih dužnika čije su obaveze bile predmet kupoprodaje plasmana, te da se oni ne dovedu u nepovoljniji položaj u odnosu na onaj koji su kao dužnici imali prema banci

prodavcu, uključujući obavezu i način dostavljanja te ažuriranja podataka za plasmane koji su predmet prodaje u Centralni registar kredita u skladu sa propisima CBBiH.

- (3) Banka prodavac je dužna osigurati da se svi rizici i troškovi iz procesa iz stava (1) ovog člana prenesu na kupca.
- (4) Naplata plasmana u smislu ovog člana uključuje i aktivnosti potrebne za naplatu:
 - a) iz instrumenata osiguranja te
 - b) u slučaju likvidacionog i stečajnog postupka nad korisnikom plasmana definiranog u članu 2. stav (1) tačka h) ove odluke.

4. TRAJNOST PLASMANA, DOKUMENTACIJA KOJU BANKA DOSTAVLJA AGENCIJI ZA POTREBE ISPUNJAVANJA PROPISANIH UVJETA I ZAKLJUČENJE UGOVORA

Član 10.

Trajnost prijenosa plasmana ili rizika i koristi s osnove plasmana

- (1) Banka prodavac mora osigurati da su plasmani ili da su rizici i koristi s osnove plasmana trajno preneseni na kupca.
- (2) Banka prodavac je dužna prodani plasman isknjižiti iz bilansa u momentu izvršenja obaveza iz ugovora o kupoprodaji plasmana, nakon što je, u skladu sa internim aktima banke, za razliku između nominalne i ugovorene cijene predmetnog plasmana, osigurala odluku nadležnog organa ili drugog tijela banke o trajnom otpisu nenaplaćenog plasmana u pisanoj formi.
- (3) Trajni prijenos plasmana ili rizika i koristi s osnove plasmana, u slučaju raskida ugovora o prodaji plasmana, ugovorne strane će osigurati odredbom u ugovoru koja je u skladu sa odredbama člana 6. stav (5) ove odluke.

Član 11.

Dokumentacija

- (1) Osim zahtjeva za saglasnost Agencije iz člana 12. stav (1) ove odluke, banka prodavac je dužna Agenciji dostaviti sljedeću dokumentaciju:
 - a) nacrt ugovora o kupoprodaji plasmana koji banka prodavac namjerava sklopiti sa kupcem, uključujući datum namjeravanog sklapanja ugovora,
 - b) obrazloženje ekonomske opravdanosti i razloga za prijenos plasmana odnosno rizika i koristi s osnove plasmana, sa dokazima o ispunjenosti općih i posebnih uvjeta iz člana 6. i 7. ove odluke,
 - c) rezultate procjene efekata kupoprodaje plasmana na banku nakon prodaje iz člana 5. stav (1) tačka c) ove odluke,
 - d) opis načina financiranja, odnosno izvor financiranja kupnje plasmana ili rizika i koristi, prema uvjetima utvrđenim u članu 4. stav (3) tačka c) ove odluke i
 - e) popis osoba povezanih sa kupcem plasmana na način kako je uređeno članom 2. stav (1) tačka u) Zakona, te opis načina na koji su povezane.
- (2) Osim podataka i dokumentacije navedenih u stavu (1) ovog člana, Agencija može zatražiti, a banka prodavac je dužna dostaviti, i drugu dokumentaciju koju smatra potrebnom za procjenu ispunjenosti uvjeta za kupoprodaju plasmana propisanih Zakonom i ovom odlukom.

Član 12.

Saglasnosti Agencije

- (1) Nakon što ocijeni da su ispunjeni opći i/ili posebni uvjeti za kupoprodaju plasmana propisani Zakonom i ovom odlukom, Agencija će banci prodavcu izdati saglasnost za kupoprodaju plasmana utvrđenih ovom odlukom.
- (2) Ako Agencija ocijeni da nije ispunjen neki od uvjeta propisanih ovom odlukom u skladu sa članom 12. stav (1) ove odluke, pozvat će banku prodavca da, najkasnije u roku koji odredi Agencija, poduzme radnje za ispunjenje tog uvjeta.
- (3) Ako banka prodavac ispuni uvjet u navedenom roku, Agencija će izdati saglasnost u skladu sa stavom (1) ovog člana.
- (4) Ako banka prodavac u ostavljenom roku iz stava (2) ovog člana ne ispuni uvjet, Agencija neće izdati saglasnost banci prodavcu za zaključivanje ugovora o kupoprodaji plasmana i upozoriti je na neispunjenje potrebnih uvjeta iz ove odluke i zahtjev će odbaciti zaključkom kao neuređan.
- (5) Ako u periodu od dana podnošenja zahtjeva Agenciji za saglasnost, a prije izdavanja saglasnosti Agencije iz stava (1) ovog člana, dođe do promjena bilo kojih činjenica i okolnosti povezanih s kupoprodajom plasmana, banka prodavac je o tim promjenama dužna pismeno obavijestiti Agenciju, koja će nove činjenice i okolnosti uzeti u obzir u ispitnom postupku o ispunjavanju uvjeta iz ove odluke.
- (6) Izuzetno, ako Agencija procijeni da su promjene činjenica i okolnosti važne za ocjenu ispunjavanja uvjeta propisanih ovom odlukom, u razumnom roku će obavijestiti banku prodavca da počinje teći novi rok iz člana 7. stav (2) ove odluke.
- (7) Ako u periodu nakon izdavanja saglasnosti Agencije, a prije zaključenja ugovora o kupoprodaji plasmana, dođe do promjena činjenica i okolnosti povezanih s kupoprodajom plasmana, banka prodavac je o tim promjenama dužna obavijestiti Agenciju. Od datuma dostave te obavijesti počinje teći novi rok iz člana 7. stav (2) ove odluke.
- (8) Izuzetno, Agencija može ocijeniti da promjena činjenica i okolnosti nije utjecala na izdatu saglasnost o ispunjavanju uvjeta, te će o tome u razumnom roku obavijestiti banku prodavca.

Član 13.

Zaključenje ugovora o kupoprodaji plasmana

- (1) Banka prodavac može zaključiti ugovor o kupoprodaji plasmana sa kupcem nakon što je dobila saglasnost Agencije kojom je ocijenjeno da su ispunjeni svi potrebni uvjeti propisani zakonom i ovom odlukom
- (2) Ugovor iz stava (1) ovog člana banka prodavac može zaključiti u daljnjem roku od 60 dana od prijema saglasnosti Agencije.
- (3) Banka prodavac dužna je da u roku od 7 dana od zaključenja ugovora o kupoprodaji plasmana obavijestiti Agenciju o zaključenju ugovora i kopiju ugovora dostavi Agenciji.
- (4) Banka prodavac dužna je Agenciji bez odlaganja dostaviti svaku izmjenu ugovora o kupoprodaji plasmana.
- (5) Banka prodavac dužna je obavijestiti Agenciju o eventualnom odustanku od zaključenja ugovora o kupoprodaji plasmana.

5. ZAŠTITA KORISNIKA FINANSIJSKIH USLUGA

Član 14.

Zaštita korisnika finansijskih usluga

- (1) Prilikom sklapanja ugovora o kupoprodaji plasmana odobrenih korisnicima finansijskih usluga iz propisa o zaštiti korisnika finansijskih usluga, sa drugom bankom ili finansijskom organizacijom koja ima dozvolu Agencije, neovisno o iznosu plasmana, banka prodavac dužna je osigurati da ti korisnici finansijskih usluga ne dođu u nepovoljniji položaj na osnovi zaštite korisnika finansijskih usluga u odnosu na položaj koji su kao dužnici imali prema banci prodavaocu.
- (2) Banka prodavac, plasmane po osnovu kredita i druge usluge odobrene korisnicima finansijskih usluga, može ustupiti isključivo drugim bankama ili finansijskim institucijama koje imaju dozvolu Agencije

6. PRELAZNE I ZAVRŠNE ODREDBE

Član 15.

Evidencije i izvještavanje Agencije o kupoprodaji plasmana

- (1) Banka prodavac dužna je podnositi zahtjev za izdavanje saglasnosti za kupoprodaju plasmana na obrascima koje posebnim aktom propisuje Agencije.
- (2) Banka prodavac dužna je voditi evidenciju o svim prodatim plasmanima, koja sadrži podatke o zaključenim ugovorima o kupoprodaji, kupcu, kao i ostale podatke neophodne za sačinjavanje izvještaja iz stava (3) ovog člana na obrascima koje posebnim aktom propisuje Agencija.
- (3) Banka prodavac dužna je dostavljati Izvještaj Agenciji u pisanoj i elektronskoj formi kvartalno odnosno u roku od 30 dana nakon poslednjeg dana izvještajnog kvartala.

Član 16.

Stupanje na snagu

Ova odluka stupa na snagu 8 dana od dana objavljivanja u "Službenom listu Federacije Bosne i Hercegovine", od kada se primjenjuje.

Broj: U.O.- /17
Sarajevo, __.__.2017. godine

PREDSJEDNICA
UPRAVNOG ODBORA
mr. sc. Ljerka Marić, dipl.ecc.